

CANT

Weinfeld: la Festa svizra da cant è a fejn

Igl pi ot predicat per igls organisatours



Dus monds, dus culturas èn s'inscuntradas sonda passada tar l'amprema farmada digl Chor viril Surses a St. Margrethen. Igl dirigent digl chor Luzius Hassler cun treis fans dalla Tschechia tgi eran sen viadi vers Geneva all'Euro 2008.

● **anr/G.N.S.** La festa da cant federala 2008 totga agl passo. 495 chors èn sa preschentos agls experts. 73 gedas on igls experts do igl predicat «excellent». Egn da chels ò er survagnia igl Chor viril Surses. Cun en concert da vaglia ò igl chor surmiran do ena degna finiziun alla festa a Weinfeld.

An preschschientscha da cunsigliera federala Eveline Widmer-Schlumpf, è eida a fejn dumengia passada la Festa svizra da cant a Weinfeld.

La viseta dalla magistrata è stada egn digls puncts culminonts dalla festa tgi è stada durant dus fejn d'emda. Er mess accents on pero la davosa fejn d'emda igl Chor viril Surses ed igl Chor da juvenils grischun cun igls dus concerts da festa. Digls 21 chors grischuns tgi èn sa preschentos agls experts eran cuagl Chor viril Alvra, cuagl Chor viril Lantsch e cuagl Chor viril Surses er treis da Surmeir. Igl dus chors da Sotses èn stos l'amprema fejn d'emda a Weinfeld ed igl chor da vallada da Surses è sto sonda e dumengia passada aint igl cantun Turgovia. Tot respect digls dus chors dalla Val Alvra tgi èn turnos cuagl predicat «fitg bung» da Weinfeld. Er igl Chor grischun da Wil e conturn, agl qual appartignan er cantadours/as da Surmeir ò ratschet en «fitg bung».

Treis ulteriours «excellents»

73 chors on persvadia igls experts schi fitg tgi els on gist do igl pi ot predicat pussebel. Da chel dumber èn otg chors digl Grischun e siva dalla davosa fejn d'emda totgan er igl Chor viril Surses, igl Chor viril Igis ed igl Chor da juvenils grischun tar chels chors tgi dastgan esser loschs. Pero menziunos seian er igls chors pi pitschens tgi èn stos a Weinfeld ed on contribuia blier per la bela festa da cant tgi resta anc dei an regurdientscha. Passa 15 000 can-

tadours/as e madem blers visitaders on galdia la hospitalitad generosa e l'organisaziun excellenta a Weinfeld. Anfignen 70 cars u bus per de on mano igls cantadours/as alla festa e 31 experts on piglia igls chors sot la marella. 1'000 voluntaris on procurò tgi la famiglia da cant svizra sa catta bagn aint igl martgea cun 9'000 abitants.

La sala ple tgi fullanada

31 chors on gia l'onour da dar alla festa la dretga noda cun en concert

da gala. Er treis chors grischuns on procurò cun cant digl pi fejn tgi igl auditori è sto perdetga sen tge ot nivel tgi igl cant è an Svizra. Igl Chor Ligia Grischa ò do l'antschatta agls concerts da gala ed igl Chor viril Surses è sto egn da chels chors tgi ò concludia igls concerts da festa. Venderde passo ò dantant er igl Chor da juvenils grischun musso tge potenzial da cantadours/as giovens tgi è avant mang aint igl cantun. Quant a cor tgi igl auditori ò igl cant rumantsch ò vasaia sonda passada igl Chor viril Surses tar igl concert aint igl «Rathaus» a Weinfeld. Gio dei avant igl concert davigl strusch en plaz liber ed igls Surmirans tgi stattan alla bassa èn rivos an rotschas. Luzius Hassler, igl dirigent premuro digl Chor viril Surses, veva tscharnia en program scu fatg per en concert da festa. L'antschatta ò igl chor fatg cun tschintg canzuns tradiziunalas e surtot «La baselgia viglia da Lantsch» e «Return» on procurò tgi a l'egna u l'otra persunga è gist nia pel gagligna. Igl toc da mez ò igl chor deditgia agl «Mond digl paster pitschen» tgi igl chor ò canto a caschung digl giubilum da 100 onns. Concludia ò igl chor igl concert da vaglia cuagl grond hit actual «Surses» e gist mess igl punct sen igl i agl concert tgi è sto ple tgi angal reclama per noss chors rumantschs.



Igl Chor viril Surses è ainten la situaziun favorevla d'aveir blers cantadours giovens e quatter da chels vainsa gist cò curt siva dalla concorrenza da paia a Weinfeld. (da san.) Dario Janett, Gianign Arpagaus, Benjamin Arpagaus e Mitgel Arpagaus.

